

MEI 2025 / BIL. 13 / 2025

EON

Epitome of Nature

PENDIDIKAN BERKUALITI



MAJALAH PP BIOLOGI
UITMCNS

ISSN 2773-5869



9 772773 586005

MADAM MAMA PANGGILAN ISTIMEWA: PERANAN DAN TANGGUNGJAWAB PENASIHAT AKADEMIK

Dayangku Ruhayah Awang Bolhan, Siti Aimi Mohamad Yasin, Nur Izyan Ismail, Saifulrizan Norizan, Azura Ahmad
Fakulti Perakaunan, UiTM Cawangan Sarawak, Kampus Samarahan, 94300 Kota Samarahan, Sarawak

dygruhayah@uitm.edu.my

EDITOR: NOR'AISHAH BINTI ABU SHAH

Penasihat Akademik (PA) secara umum biasanya merujuk kepada seorang individu, biasanya staf akademik, yang memberikan bimbingan kepada pelajar dalam hal-hal berkaitan akademik, termasuk pemilihan kursus, perancangan kerjaya, pembangunan peribadi, matlamat serta cabaran pembelajaran. Di peringkat pendidikan tinggi, secara spesifik penasihat akademik (PA) merupakan pensyarah universiti yang berperanan dalam menyalurkan maklumat berkaitan program pengajian di peringkat pra-diploma, diploma dan ijazah, kursus dan peraturan akademik di sesebuah universiti. Manakala, melalui Pejabat Hal Ehwal Akademik & Antarabangsa (HEA&A) di UiTM telah melantik penasihat akademik dalam memberi nasihat kepada para pelajar di bawah bimbingan mereka sepanjang tempoh pengajian para pelajar tersebut. Secara purata, setiap penasihat akademik mempunyai 20 orang pelajar untuk dibimbing dari segi

akademik, sahsiah dan motivasi bagi melahirkan graduan yang berdaya saing di peringkat tempatan dan antarabangsa.

Berdasarkan sumber Buku Peraturan Akademik UiTM pindaan 2021, penasihat akademik ialah staf akademik yang dilantik oleh Dekan ataupun Rektor untuk menjalankan tugas membimbing pelajar dalam hal ehwal akademik sepanjang pengajian.

Peranan penasihat akademik amat penting bukan hanya untuk membantu pelajar mencapai kejayaan akademik tetapi juga dalam memastikan mereka siap sedia untuk menghadapi kehidupan yang lebih mencabar selepas tamat pengajian. Peranan penasihat akademik yang utama adalah sebagai pembimbing akademik, kaunselor peribadi dan juga profesional, pemudahcara sistem universiti, penghubung antara pelajar dan fakulti serta mentor kepada perkembangan insaniah pelajar. Sebagai pembimbing akademik, tugas seorang penasihat akademik adalah memberi nasihat tentang pemilihan kursus, perancangan jadual kelas, serta membantu pelajar memahami segala syarat program pengajian, keperluan kredit, dan struktur kurikulum yang terkini mengikut jurusan yang diambil. Manakala sebagai kaunselor peribadi pula dikaitkan dengan memberi sokongan dalam menangani tekanan akademik



Gambar 1: Sesi perjumpaan penasihat akademik (Madam Mama) dan para pelajar. Madam mama panggilan istimewa penasihat akademik di kalangan pelajar (Sumber: Koleksi peribadi penulis)



Gambar 2: Kelas ulangkaji persediaan sebelum peperiksaan akhir (Sumber: Koleksi peribadi penulis)

dan peribadi. Kaunselor profesional pula terlibat dalam membantu pelajar mengenal pasti minat kerjaya dan matlamat masa depan mereka.

Pemudahcara sistem universiti pula melibatkan peranan penasihat akademik sebagai pembimbing pelajar tentang polisi universiti, prosedur akademik, dan sistem sokongan seperti biasiswa dan bantuan kewangan serta memberi maklumat tentang aktiviti kokurikulum dan peluang pembangunan kemahiran insaniah. Peranan penasihat akademik yang lain adalah sebagai penghubung antara pelajar dan fakulti sebagai pengantara dalam menyelesaikan masalah pelajar dengan pensyarah, fakulti, atau pentadbiran universiti. Penasihat akademik juga membantu pelajar mendapatkan akses kepada sumber-sumber universiti seperti pusat bimbingan akademik atau latihan industri. Penasihat akademik juga bertindak sebagai mentordengan menggalakkan

Pelajar membangunkan kemahiran insaniah seperti pengurusan masa, penyelesaian masalah, dan komunikasi serta menyokong pembangunan emosi, sosial, dan profesional pelajar sepanjang tempoh pengajian. Sesi perjumpaan antara penasihat akademik dan pelajar kebiasaannya akan diadakan sekurang-kurangnya dua kali untuk tempoh satu semester; di awal dan penghujung semester sebelum peperiksaan akhir.

Tanggungjawab penasihat akademik meliputi pemantauan prestasi akademik pelajar dengan mengawasi pencapaian pelajar melalui laporan akademik serta memberi cadangan jika pelajar memerlukan bantuan tambahan seperti kelas pemulihan. Penasihat Akademik juga bertanggungjawab membantu pelajar mengatasi halangan dan cabaran dengan menyediakan bimbingan untuk mengatasi cabaran seperti kegagalan dalam kursus, isu

penyesuaian sosial, atau kekangan kewangan. Sesi bimbingan berkala juga diadakan dalam membantu pelajar untuk memastikan mereka berada di landasan yang betul dalam perjalanan akademik. Penasihat akademik juga memberikan perhatian khusus kepada pelajar yang berisiko rendah prestasi akademik atau berhenti belajar, dengan menyediakan rancangan pemulihan. Perjumpaan ini dijalankan pada minggu sebelum minggu ulangkaji peperiksaan yang kebiasaannya akan berlangsung pada penghujung minggu ke 14 ataupun awal minggu ke 15. Perjumpaan ini bertujuan menyuntik semangat dan motivasi kepada para pelajar serta tips persediaan menghadapi minggu peperiksaan yang akan datang.

Selain itu, penasihat akademik juga bertanggungjawab membantu pelajar merancang laluan akademik yang sesuai dengan minat dan matlamat kerjaya mereka serta memberikan cadangan untuk



Gambar 3: Kelas ulangkaji persediaan sebelum peperiksaan akhir (Sumber: Koleksi peribadi penulis)

kursus elektif yang berkaitan dengan kerjaya masa depan pelajar. Penasihat akademik juga menyediakan rujukan dan peluang dalam membantu pelajar berkaitan latihan industri, biasiswa, atau peluang penyelidikan, memberi surat sokongan atau cadangan kepada pelajar untuk tujuan biasiswa atau kemasukan program siswazah.

Selain itu, penasihat akademik juga mengadakan sesi kaunseling bagi memberi peluang kepada para pelajar berkongsi rasa hati dan masalah yang dihadapi berkaitan pelajaran dan juga berkisar kepada isu peribadi. Usaha yang diambil ini adalah untuk memastikan para pelajar sentiasa bersemangat untuk menempuh kehidupan sebagai seorang pelajar dan juga menyuntik semangat untuk terus berjuang dan mencapai kecemerlangan dalam pelajaran dan kehidupan.

“Penasihat akademik adalah rakan strategik pelajar”

Kesimpulannya, penasihat akademik adalah rakan strategik pelajar yang memberi sokongan dari segi panduan akademik, emosi, dan penyelarasan kerjaya, yang semuanya membantu meningkatkan kejayaan dan kemenjadian pelajar secara menyeluruh. Melalui hubungan yang dinamik dan penuh kepercayaan, penasihat akademik bukan sahaja membantu pelajar mencapai kecemerlangan akademik tetapi juga membina daya tahan, keyakinan diri, dan kemahiran hidup yang penting untuk menghadapi cabaran masa depan. Peranan penasihat akademik menjadi penggerak utama dalam membentuk generasi graduan yang bukan sahaja berjaya dalam bidang akademik tetapi juga bersedia menyumbang dan memberi manfaat kepada masyarakat sekeliling.



Gambar 4: Sesi kaunseling Madam Mama bersama para pelajar (Sumber: Koleksi peribadi penulis)